





Литературный альманах

«Уян дуушан болонхойб»

Алла нютагайнгаа поэт Геннадий Ринчиногой зохёохы ажалтайнь танилсуулха хүсэлэнтэйбди. Геннадий Ринчино 1945 оной сентябриин 10, бугын урамдаанай үедэ Ринчино Радна Партуевич ба Дулгарма Дондуповна хоёрой гэр бүлэдэ юһэн үриин ууган хүбүүн мүндэлжэ,аба эжыгээ, нютаг зонооо баярлуулаа.

Аллын найман жэлэй хургуули түгэхөөд, саашаа 1962 ондо Хурамхаанай дунда хургуули дүүргээ. 1964-66 онуудта Баргажанай газетэдэ корреспондентээр ажаллажа эхилээ. Тэрэнэй һүүлдэ «БуряадҮнэн» газетэдэ ажалаа үргэлжэлүүлбэ. 1968 ондо СССР-эй журналистнуудай гэшүүн болобо. 1972 ондо Доржо Банзаровай нэрэмжэтэ Буряадай гүрэнэй багшанарай институт дүүргэжэ, «Баргажанай Үнэн» газетэдэ редакторой орлогшоор наһанайнгаа амаралтада гаратараа ажаллаа. 1990 ондо «Сэлмэг гуниг» гэжэ шүлэгүүдэйнь согсолбори хэблэгдээ. Энэ номой гол темэнүүд гэхэдэ тоонто нютаг, наһанай харгы замууд, инаг дуран.






*Аршаан булагай эхиндэ,
Алла хадын хормойдо,
Алла горхоной эрьедэ,
Алла гэжэ нютагта,
Хүнхэр тайгын үбэртэ,
Хүмэг шулуунай забһарта,
Хайр шулуун хүрьһэн соо
Тоонто минии булаатай*



Эльгэн шулууд,
Юуд гээшэбта?
-Эрэлхэг хүбүүдэй
Зурхэд гээшэбди...



Намар түрөө хэм, Намар...
Набша намаа, ногоо сэсэг
Хагдаржа байгаа хэн, намар...
Буурал тайгада
Буга урамдаа хэн.





*Анхан дэлхэйдэ түрэхэдэм
Алла хадымни оройдо
Алаг буга урамдаа.
Үлгы соогоо хэбтэхэдээ
Урамдааень шагнаһандаа
Уян дуушан болонхойб.*

*Айдар залуу үедэм
Аллын хангай тайгада
Хүхы шубуун донгодоо.
Хүбүүн ябаһан наһандаа
Хүхын дууе дахаһандаа
Харгын холые зоринхойб.*

*Арбаадхан наһатай ябахадам
Аадарай түргэн бороондо
Алла горхомни үерлөө
Үхибүүн балиар наһандаа
Үер гаталан гараһандаа
Үндэр зориг абанхайб.*

*Анхан дэлхэйдэ түрэхэдэм
Алла нютагайм хүнүүд
Аба, эхэтэйм баярлаа.
Заахан үшөө байхадаа
Зоной олондо юрөөлгэхэндөө
Зоной түлөө оролдоноб.*

*Аляа гүлмэр байхадам
Аллын нуурай үбсүүндэ
Сагаан шубууд наадаа.
Сэнгүү энэ наһандаа
Сарюухан шубуудые хараһандаа
Сэдьхэл сагаан ябаналби.*



Газаа бүгшэм
Газар халуун...
Эжымнай:
-Эрээгшэмнай
Эбилнэгүй,-
Гэжэ
Гэмэрнэ
Үглөө бүри,
Үдэшэ бүри.
Эжы-аа, эжы,
Эрээгшэндээ бү сухалда.
Энээхэн хаядаа
Нуга бэлшээрідээ
Ногоон найжарха...
Эжы-аа, эжы,
Эрээгшэмнай
Эбилжэ

Элбэгжэхэл
Эдеэн...
Эжы-аа, эжы,
Энэ үглөө
Эртэлэн
Буурал хадын
Булган тайгада
Дэлэнишэ шубуун
Дуулахыг шагнааб...
Эжы-аа, эжы,
Дэлэнишэ шубуухайн
Дуулахада
Дэлгэнэдэг бишуу
Эрэгшэмнай бишуу,
Эжы-аа, эжы,
Газаа бүгшэм,
Газар халуун...



*Балиар бага наһандаа
Байсада ошојсо ахатаяа
Бүргэдэй ниидэхые харахадаа,
Бүрүүлтэжэ шалаһан нюдэдөө
Бүтүүхэн гараараа аршајса,
Уурхайгаа хаяјса ошоһон
Уулын бүргэдэй хойноһоо
Хүхэрэгшэ холые шэлэһэндэнь
Хүсэтэ далинуудаарнь омогорхон,
Хайр шулуу дамжајса,
Харайлдагша бэлэйбди дахан...*



Нэгэ заншал

*Түрэл арадайм намтар түүхэдэ
Сагаар шалгуулһан заншалнууд биш.
Тэдэнэйнь олые мүнөөшье бидэ
Сахижал һуунабди ажабайдалдаа.*

*Үе наһаараа үбгэ эсэгэнүүднай
Үхэрэй хойноһоо нүүжэ ябахадаа
Үбэлжөөндөө гү, али зуһаландаа
ошоходоо
Үнэхээ бэлээрээ абалсагша бэлэй.*

*Буусадаа гу, али бэлиээрэдээ
хүрэмсээрээ
Байрлаха газараа шэлэн түхээрхэдөө
Асарһан үнэхээ шаладаа дэлгээжэ,
Гал гуламтаяа шэнэдхэдэг гээшэ.*

*Удаань шанаһан эдээнэйнгээ дээжые
Улаан гал ехэ гуламтынгаа
Унтарангуй ходо байхынь түлөө
Үргэдэг занилтай гал заяашадаа.*

*Буряад зоной дунда оройдоо
Холын урда сагнаа нааша
Бог щоройгоо галдаа суглуулжа
Хаядаг хүнүүдые харахагүйт одоо.*

*Түрэл мини арад иигэжэ
Түби энэ дэлхэй дээрэ
Гал ехэ гуламтаяа тахижа,
Гасалангүй ажаһууна гээшэ.*



*Хадымни горхон,
Хайшаа харъялнаш?
-Баргажан голдоо.*

*Тиигээд хайшаа
Тэгүүлнэбиш даа?
Нютагагайхидтаа.*

*Тэндэхээ хайшаа
Тэгүүлнэбиш даа?
-Байгал далайдаа.*

*Удаань хайшаа
Үшөө зүдхэнэш?
-Арад түмэндөө*

*Байгал далайһаа
Баһа хайшаа?
-Газаа далайдаа.*

*Солгёон сэдхэлни,
Хайшаа зоринош?
-Гал гуламтадаа.*



Айрис пресс-центр

Учредитель: МБОУ «Дыренская СОШ»

Адрес редакции: с. Алла ул. Ленина 43.

Телефон: 95-2-43

Главный редактор: Цыбенов Тамир

В сборнике использованы стихи Г.Ринчино из сборника «Сэлмэг гуниг».

Рисунки по мотивам стихотворений: Шаг-дуров Алдар, Дамбаев Дансаран, Дырчикова Дари.

Вёрстка альманаха Цыбенова Тамира..

Руководитель: Цырендашиева Б.Б.